

## **SEKAPUR SIRIH**

Assalamualaikum Warahmatullahi Wabarakatuh,

Alhamdulillah, saya merakamkan ucapan tahniah kepada UiTM Cawangan Negeri Sembilan di atas penganjuran Karnival Sukan Mahasiswa UiTM ke-29 (KARiSMA 2024). Sukan merupakan jambatan yang menghubungkan hati dan minda, membina kepercayaan diri, serta merangsang semangat kebangsaan. Setiap tindakan dan kemenangan di dalam arena sukan membawa bersama-sama cerita dan kisah kejayaan yang mampu memotivasikan setiap individu. Penglibatan mahasiswa dalam aktiviti sukan, seperti Karnival Sukan Mahasiswa UiTM, merupakan satu langkah positif dalam membentuk generasi profesional yang berdaya saing dan berkebolehan menyumbang kepada pembangunan negara. Melalui pengalaman sukan, mahasiswa dapat meningkatkan jati diri, memperoleh asas pendidikan yang kukuh, membina daya tahan fizikal mahupun mental, serta mengembangkan kefahaman yang lebih matang terhadap nilai-nilai seperti kerjasama, komitmen, dan kecekapan diri.

Terima kasih dan syabas kepada semua pihak yang telah terlibat dalam penyelenggaraan Karnival Sukan Mahasiswa UiTM ke-29 kali ini. Semua usaha keras dan kerjasama yang diberikan pastinya akan memberi pulangan yang baik, yang mana kita juga berharap generasi mahasiswa akan terus berkembang menjadi individu yang cemerlang dan bertanggungjawab. Sekalung penghargaan juga diberikan kepada seluruh kampus cawangan UiTM yang turut serta, sama ada secara langsung atau tidak langsung, dalam memeriahkan acara ini. Semoga karnival ini menjadi salah satu platform yang akan memupuk semangat persaudaraan dan semangat kejohanan dalam kalangan mahasiswa UiTM. Selamat berjuang saya ucapkan kepada semua atlet UiTM!

Sekian, terima kasih.

**YAB DATO' SERI HAJI AMINUDDIN BIN HARUN**  
Menteri Besar Negeri Sembilan

## SETITIS TINTA

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Salam Sejahtera dan Salam UiTM Di Hatiku....

Syukur ke hadrat Allah SWT atas limpah kurnia serta izin-Nya, dapat kita melaksanakan Karnival Sukan Mahasiswa UiTM ke-29 (KARiSMA 2024) bertempat di UiTM Cawangan Negeri Sembilan. Kejohanan KARiSMA merupakan acara sukan tahunan UiTM yang pastinya ditunggu-tunggu oleh warga UiTM seluruh Malaysia. Saya pasti, acara ini sentiasa mendapat sokongan dan komitmen yang padu daripada semua warga UiTM yang dapat dilihat melalui penyertaan dan penglibatan atlet daripada seluruh kampus cawangan.

UiTM sentiasa menyokong penuh penglibatan para mahasiswa dalam aktiviti sukan bukan sahaja pada peringkat universiti, malah sehingga peringkat antarabangsa. Kejohanan sukan peringkat tinggi sebegini merupakan landasan yang terbaik untuk mencungkil bakat dan seterusnya mengembangkan potensi mahasiswa sebagai pelapis serta peneraju kepada pembangunan sukan negara. UiTM sebagai institusi pendidikan tertinggi semestinya menjadi tempat yang paling sesuai untuk menggilap kemahiran insaniah melalui penganjuran temasya sukan. Justeru, saya menyeru kepada mahasiswa dan para atlet semua yang terlibat secara langsung atau tidak langsung, agar mengambil manfaat sepanjang berlangsungnya kejohanan KARiSMA 2024 ini. Saya yakin, bahawa penglibatan warga UiTM dalam karnival sukan ini, dapat membantu menjayakan aspirasi universiti ke arah melahirkan atlet tersohor yang mampu memberi daya saing sehingga ke peringkat antarabangsa.

Penganjuran kejohanan tahunan seperti KARiSMA ini memerlukan gabungan tenaga dan kerjasama yang jitu daripada semua pihak. Oleh itu, pengendalian karnival ini perlu konsisten dan menjadi pemacu aspirasi kepada penganjuran program-program yang lebih hebat pada masa akan datang. Dengan adanya iltizam sebegini, pembangunan dan pelaksanaan sukan di UiTM akan lebih lestari dan kukuh. Melalui kejohanan KARiSMA ini juga, nilai-nilai murni, sifat berdisiplin, bertolak ansur, ketepatan masa, semangat kerjasama, dan kepimpinan dapat dipupuk. Oleh yang demikian, kecemerlangan dalam bidang akademik dan kokurikulum harus seimbang ke arah melahirkan graduan yang dinamik dan holistik. Semoga matlamat serta objektif kejohanan KARiSMA 2024 pada kali ini akan kita capai dengan jayanya.

Akhir sekali, tahniah dan syabas saya ucapkan kepada UiTM Cawangan Negeri Sembilan selaku penganjur KARiSMA 2024, kampus-kampus negeri, ahli jawatankuasa, para atlet serta semua yang terlibat dalam menjayakannya.

**YBHG. PROFESOR DATUK DR. SHAHRIN BIN SAHIB @ SAHIBUDDIN, FASc**

Naib Canselor

Universiti Teknologi MARA

